

## **Lu misteru**

Lu nivuru di la notti  
è un linzolu immenzu  
dunni cci su' li stiddi  
chi su' tanti pirtusiddi,  
quannu era 'nnuccenti,  
iu pinzava.

P'a lu celu acchianari  
sempri, araciu araciu,  
una gran scala di sita  
e c'un occhiu taliali  
lu misteru d'addabbanna,  
iu disiava.

Ma arrivatu a metà,  
la dilicata scaluzza,  
'nta un nenti, sì rumpia  
e 'n terra amaramenti,  
cu' lu cori scunzulatu,  
iu turnava.

Ora chi picciliiddu,  
ahimè!, 'un sugnu cchiu',  
risposta, purtroppu, 'un m'haiu datu  
e ancora m'addumannu,  
soccu c'è?

Forsi 'un c'è nenti,  
o forsi c'è un gran suli?  
E quannu ad ogni misi,  
un pirtusu c'è cchiù granni,  
chi è l'occhiu di un ddiu

chi mentri nni talia,  
chiancennu nni cummisera,  
pi' soccu semu ccà?

## 'Na matri

'Nna vecchia matri ridutta nica nica  
storta di travagghiu e cchiù di duluri,  
un figghiu cci appizzau di trent'anni  
e doppu jorna, mischinu, lu maritu,  
camina assai affannata pi' la via  
cu' l'occhi 'n terra e a nuddu talia.  
La so' vucca 'nzirrata 'un riri mai,  
l'occhii avi tristi e scunzulatu  
'unciu, mi pari, di chiantu suffucatu.  
Ah, chi duluri chi mi fa, chi pena,  
quannu cunfusa pi' la strata la viu  
chi si tratteni a quarchi cantunera,  
comu Madonna c'un pugnali 'm pettu.  
Vulissi allura, piatusu, cunzularla,  
pigghiannula 'm brazza e annacarla.  
E si duluri 'un esisti doppu morti,  
carizzannucci li bianchi capiddi,  
cuitarla finalmenti pi' l'eternità,  
cantannucci l'alaò a la riversa,  
jè fighhiu a idda matri pinitenti,  
cu' l'occhi succhiusi sirenì e cuntenti.

## Mi sunnavu a me nannu

Me nannu Pepè 'sta notti mi sunnavi  
ch'alliviscia c'un pocu 'i nanni vavi,  
beddu mi parsi 'ncarnatu 'nna lu visu  
cu' l'occhiu sirenzu 'mpustatu a sorrisu.

Doppu chi ficimu li presentazioni  
e puru cu' affettu filicitazioni,  
accuminciau a taliarisi attornu,  
un pocu cunfusu, cchiu' scuru chi jornu.

Quanti sorpresi 'nta so' facci liggia  
quannu smarritu tanti cosi scupria;  
'na scatola maggica, la televisioni  
cu' pupi parlanti, Maria, chi 'mpressioni.

Un cantaranu chi l'acqua arrifrisca,  
la carni, lu vinu e latti 'nta cisca;  
la luci addumava in ogni pirtusu  
picchi' c'un buttuni facia susu e jusu.

Chi maravigghi, chi granni purtenti,  
taliava alluccutu e paria cuntenti.  
Lu vitti pero' 'n anticchia perplessu,  
cci rissi: "Nonno", a ssa veni d'appressu".

Nischemu 'nta strata, era ancora matina  
cu' l'occhi di fora, scantatu camina.  
Mancu du' passi sutta lu marciaperi,  
saittaru tri machini, un motori 'n arreri.

Passa mezzura e lu trafficu aumenta,  
carretti cchiu' 'un viri, lu senzu cci allenta.

“Pinu”, ma ch’è ‘nfernū” e l’occhiu cci acchicchia,  
la facci giannia e mi pari minnicchia,

picchi’ ‘nta lu celu luntanu, luntanu  
scopri un aereu chi fa gran baccanu;  
‘nta ll’aria taliannu e ancora ‘un criria  
campani sunavanu e battagghiu ‘un viria.

Cci rissi: “Nonno”, iemuninni a lu corsu”,  
ma fu peggju ancora, lu vitti cchiu’ scossu:  
un omu a distanza, la manu a l’aricchia  
stava ‘n zilenziu e parlava ‘n anticchia.

‘Na bedda signura, fumannu ‘nta strata,  
assai eleganti, la facci pittata,  
li causi stritti, maglietta attillata  
‘na manu a la testa purtava accuppata.

Mi rissi: “Pinu”, ma chi hannu ‘ssi genti?  
Cci doli l’aricchia e ririnu cuntenti?”.  
Mischinu ‘un sapia chi dintra di la manu  
c’era lu cellulari chi parlari fa luntanu.

Stranu cci paria ch’eranu sorridenti  
convintu ch’avianu otiti purulenti.  
Virennulu sturdutu, naufragatu ‘nta mari,  
cci rissi: “Nonno”, ti portu a navigari”.

Pinzava, puvureddu, di iri a la marina,  
accattari li sardi, macari ‘na sacchina,  
pi farli arrustuti cu’ l’aggchia e lu basilicu  
ch’eranu tant’anni ch’avia l’allammicu.

Quali delusioni, nni fui mortificatu,  
quannu vicinu a mia l’appi assittatu,  
allura chi capiu chi iu pi navigari  
‘ntinnia a lu computer, cliccari, zammatiari.

Taliannumi 'nta ll'occhi mi rissi araciu, araciu;  
"Caru niputi me", mi sentu assai a disagiu.  
È megghiu mi nni tornu di dunni vinni antura...".  
Sunau 'a radiusveglia chi mi signava l'ura.

## Li nostri vecchi

Supra rami d'alivi assitati  
piatusu lu suli muria  
tincennu di rosa balati  
cu' runzi e spinazzi  
a cunfini spuntati.  
Un cantu d'amuri  
'na cicala oramai stanca  
cantava  
doppu un jornu a sperari  
e paria chiantu.

Un vecchiu a 'dd'ucchiddu di suli  
cu' manu di petra allisciava  
'na conchiglia cunzunta  
e farfalli di passatu scacciava.

Li nostri vecchi a lu suli  
'un parlanu, 'un penzanu cchiu'.  
e lu primu amuri, forsi  
da un pezzu, 'un cunta cchiu' nenti.

Li nostri vecchi a lu suli  
'un sonnanu nenti  
dolinu sulu luntani mumenti  
sutta l'alghi di la vita ammassati  
e 'un ririnu mai.  
Chiancennu 'n silenziu  
luntani turmenti  
'ustanu, cu' gelu a lu cori,  
l'urtimi stizzi di celu e  
aspettanu la limosina di la morti.

## 'Nvernū e duluri

E fu accussi'  
chi scumparsi l'aceddi  
arrivau lu 'mmernu,  
cu' 'na notti di ventu.  
E iu risbigghiati ri tantu tempu,  
mi sintia stancu  
di tutti li notti 'nzonni  
e di tuttu lu pisu di la me' vita.  
'Ntra li 'ngagghi di la finestra  
trasia lu ventu di sciloccu  
chi cuntrastava cu' lu maistrali  
e paria musica lamintusa  
nisciuta d'un organu  
a sunari la zuffa  
di l'estati massacrata  
'nta li rocci a la spiaggia.  
Notti d'infernu e arba d'agunia.  
Tuttu lu celu nivuru, vasciu e gunciu,  
cu' lu ventu di sciloccu  
chi vinciuta la lotta di la notti  
purtava di lu vadduni  
un rombu spaventusu  
comu di mari in tempesta.  
Arba d'agunia e jornu di morti.  
Scumparsi l'aceddi,  
scumparsu lu mè amuri.  
Sulu 'na lettera arristau  
fatta a pizzuddicchia  
'nta li manu.  
E fu allura chi,  
suffucannu pi' lu straziu,  
la me' anima scueta

apriu la finestra  
pi' circari refrigeriu.  
Ma lu ventu latru e piatusu  
si purtau d'appressu  
'ddi pizzuddi di carta  
comu petali d'un ciuri  
chi si sfogghia, picchi' ormai finiu  
lu tempu d'a so' vita  
e vinni chiddu di la pena.

## O petri

O petri chi cuntati tanta storia,  
dicitimilla a mia quali la causa,  
la causa vera, tristi e sfurtunata  
di la rovina vostra fatali e maistusa.  
Si fu terribili, naturali cataclisma  
o la presunzioni orva e maliritta  
di li genti vostri, tosti e camurriusi  
o megghiu di li vostri guvernanti  
cechi cu' l'occhi e chini di boria.  
Vui nun parlati a nuddu è veru  
picchi' vucca 'un aviti, ma puru  
lu silenziu vostru è assai significanti.  
E mi ricitì a mia e a tutti quanti  
chi si mai tirrimmotu avissi statu  
putenti e catastroficu, senz'uguali,  
certu la putenza di lu vostru populu  
v'avissi 'n quarchi seculu riartzati.  
Ma essennu la quasanti vera e crura  
la totali distruzioni causata di la guerra  
contru li Segestani, feri muntagnisi  
e l'alleati so' vinuti di luntanu,  
l'imperiu vostru e la putenza granni  
fu distruruta assemi cu' li petri  
e li culonni e li capitelli immenzi  
di li templi vostri e di li mura arditu.  
V'immagginati allura quali spettaculu,  
si la sorti vostra diversa fussi stata?  
Oggi a li nostri occhi di 'stu seculu  
e chisa' pi quanto tempu di futuru,  
fussivu forti, diritti a sfidari lu celu  
e a tuccari l'ali di l'aceddi in volu.  
E inveci siti sbattuti, strafuttuti 'n terra

tanti voti cu' tamburi e culonni allineati,  
atri voti sparsi a casu, a com'egghiè,  
a monitu perenni, perpetuu e inascoltatu  
di l'inutilita' d'ogni stupida guerra.